



Komunikadu Imprensa
07 Agostu 2023

**JSMP fahe informasaun kona-ba asesu ba justisa formál iha aldeia iha suku pilotu ba
projetu PASK iha Munisípiu Baukau no Ermera**

Iha 28 Jullu 2023, JSMP realiza treinamentu kona-ba oinsá lori prosesu sira ba iha justisa formál ba comunidade aldeia rua (2) iha suku tarjetu sira ba Programa Apoiu Justisa Komunitáriu (PASK) hanesan Aldeia Osogigi iha Suku Uma-Ana-Ulu Postu Administrativu Venilale, Munisípiu Baukau no Aldeia Aiurlala, Suku Samalete, Postu Administrativu Railaku, Munisípiu Ermera.

Materia iha treinamentu ne'e kompostu husi definisaun kona-ba lei, definisaun kona-ba krime, tipu krime no oinsá atu prosesu krime sira ho natureza krime públiku no krime semi públiku no saida mak estrutura aldeia sira bele halo hodi tulun comunidade sira hodi rezolve sira nia disputa inklui tipu pena no serbisu rede referál ba assisténsia legál ba vítima volénsia bazeia ba jéneru.

Totál partisipante treinamentu iha Aldeia Osogigi hamutuk ema na'in 29, kompostu husi mane 21 no fetu 8 inklui difisiénsia matan na'in 1. Entretantu totál partisipante sira iha Aldeia Aiurlala hamutuk ema na'in 23, kompostu husi fetu 7 no mane 16 inklui ema ho defisiénsia psíkiku ida. Partisipante sira ne'e, mak hanesan xefi aldeia, lia na'in aldeia, lia na'in uma lisan no ema potenciál sira ne'ebé comunidade sira fó fiar hodi envolve iha sira nia disputa hanesan makleha no ka maksawar¹, veteranu, representante eskola no representante igreja hanesan katekista no mós comunidade sira ne'ebé iha ona esperiénsia ba kazu tantu iha prosesu justisa formál no mós iha justisa komunitáriu.

“JSMP hakle'an tan treinamentu kona-ba prosesu iha justisa formál to'o iha nivel aldeia tanba depoisde JSMP nia serbisu hamutuk iha suku tarjetu sira, JSMP deskobre katak prosesu rezolve disputa iha justisa komunitáriu iha nivel suku estruturadu nanis ona no prosesu rezolve disputa presiza hahú uluk husi uma lisan no bainhira laiha konkordánsia foin ba iha nivel aldeia no kontinua ba iha nivel suku bainhira nafatin la hetan konkordánsia husi parte sira. Husi serbisu hamutuk ne'e, JSMP nota katak ema sira ne'ebé envolve iha prosesu sira

¹ Ema ne'ebé comunidade no lia na'in uma lisan iha kada aldeia no ka suku tau fi'ar hodi tau-matan ba implementasaun tara bandu.

iha nivel aldeia no uma lisan menus tebes koñesimentu² ba prosesu hirak ne'e tanba sira la hetan oportunidade hodi partisipa iha dezaminasaun informasaun sira hanesan ne'e," dehan Sra. Ana Paula Marçal, Diretora Ezekutiva JSMP.

Parte seluk iha treinamentu ne'e, JSMP mós fó prioridade ba comunidade sira ne'ebé iha ona esperiênsia ba kazu tantu iha justisa formál no mós justisa komunitáriu, tanba tuir JSMP nia rezultadu entrevista no monitorizasaun ba iha disputa sira deskobre katak parte hirak ne'e laiha tebes koñesimentu kona-ba oinsá atu bele lori sira nia prosesu ba iha justisa formál bainhira sira la satisfas ho prosesu rezolve disputa sira iha justisa komunitáriu no balun bainhira sira konsege lori tiha sira nia prosesu ba iha nivel polísia, sira rasik la hatene oinsa atu bele hetan andamentu ba sira nia prosesu hirak ne'e inklui la komprende desizaun ba sira nia kazu.

Iha treinamentu ne'e, xefi aldeia husi Aldeia Osogigi no xefi suku Samalete, agradese tebes ba JSMP ninia prezensa iha sira nia le'et hodi fahe informasaun kona-ba comunidade nia direitu asesu ba justisa formál no autóridade lokál sira nia kompetênsia ba rezolve kazu krime no sivíl sira tuir lei. Enkuantu comunidade ida ne'ebé iha ona esperiênsia ba kazu, katak nia agradese tebes tanba mezmua nia hetan formasaun lubuk ida maibé foin komprende didi'ak oinsá atu lori prosesu sira ba iha justisa formál.

Durante treinamentu, partisipante sira ativu teb-tebes hodi hato'o sira-nia preokupasaun no rekomendasaun kona-ba lala'ok justisa formál liga ho prosesu rezolusaun kazu iha nivel lokál (suku, aldeia no lisan) liuliu rezolusaun ba kazu hadau malu rai, kazu inan-aman abandona oan, polísia sira nia atuasaun ba krime sira ne'ebé akontese iha comunidade no kazu feen-la'en baku malu.

Hatan ba preokupasaun hirak iha leten, JSMP esplika katak ba kazu sivíl, lei fó dalan atu autóridade lokál sira bele fasilita mediasaun bainhira parte intervenente sira konkorda bele hakotu iha suku ka aldeia. Ba kestaun inan-aman sira abandona labarik, lei mós la taka dalan atu xefe suku no xefe aldeia sira koko halo mediasaun ba sira atu inan-aman sira kontinua fó alimentasaun ba nia oan sira, maibé karik laiha konkordánsia, xefe suku no xefe aldeia bele ajuda lori direktamente ba prokuradór ka ba uluk membru rede referál sira hanesan JSMP ka ALFeLa hodi bele tulun atu refere ba prokuradór hodi prosesa tuir lei formál.

Kestaun kona-ba ajente polísia sira halo atuasaun no baku suspeitu sira to'o aleza, JSMP esplika katak tuir Kódigu Prosesu Penál, polísia sira bele halo impedimentu ba krime sira ne'ebé akontese no asegura prova sira maibé la'os atu baku ema bainhira sira iha prosesu kaptura no ka detein. Se ajente polísia sira baku suspeitu iha prosesu detensaun nia laran, família sira bele apresenta keixa ba prokuradór atu polísia sira bele responsabiliza ba sira nia

² Bazeia ba intrevista ne'ebé mak JSMP ba programa PASK hala'o durante fulan Maiu to'o Jullu 2023

aktu. Entretantu ba kazu feen-la'en baku malu, JSMP esplika kona-ba konseitu violénsia doméstika, natureza husi krime violénsia doméstika nu'udar krime públiku no definisaun família tuir lei refere. JSMP mós esplika katak tribunál maka iha liu kompeténsia hodi hakotu kazu refere maibé xefe suku ka xefe aldeia bele halo de'it konsiliaun hodi hadame parte sira no iha possibilidade, dame malu ne'e sei sai sirkunstánsia hakmaan ba arguidu.

Atividade treinamentu ne'e realiza husi JSMP liuhusi programa apoiu seguransa komunitariu (PASK), tanba serbisu hamutuk ho The Asia Foundation (TAF) ne'ebé finansia husi Embaixada Nova Zelandia.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl